

修訂日期: 2004/11/08 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 51, No. 2094

原始資料: 蕭鎮國大德提供, 北美某大德提供

## No. 2094

### 梁京寺記

#### 闕名

#### 小莊嚴寺

梁小莊嚴寺。在建業定陰里。本是晉零陵王廟地。天監六年度禪師起造。時有邵文立者。世以烹屠為業。嘗欲殺一鹿。鹿跪而流淚。以為不祥。鹿懷一麁。尋當產育。就庖哀切。同被割割。因斯患疾。眉鬚皆落。身瘡並壞。後乃深起悔責求道。度禪師發大誓願。罄捨家資迴買此地。為立伽藍。

#### 同泰寺

梁武帝改年號大同。起同泰寺。在臺城內。窮竭帑藏。造大佛閣七層。為火所焚。武帝捨身施財。以祈佛福。自大通以後。無年不幸。

#### 興國禪寺

梁武帝天監十三年。以錢二十萬。易定林前前岡獨龍阜。以葬誌公。永定公主以湯沐之資。造浮圖五級於其上。十四年。即塔前建開善寺。

#### 昇元寺

昇元寺即瓦棺寺也。在城西隅瞰江面。後踞崇岡最為古跡。累經兵火。略無彷彿。李王時昇元閣猶在。乃梁朝故物。

#### 大愛敬寺

梁武帝普通元年造。在蔣山之北高峯上。

#### 法寶寺

梁同泰寺基之半也。建康剎錄。梁武帝大通元年。創同泰寺。寺處宮後。別開一門。名大通門。帝晨夕講議。多遊此門。

#### 法光寺

即梁之蕭帝寺。舊傳。天監十三年造。元絳寺記云。不知從昔之名。故後人以帝氏目之。

#### 寶林寺

梁天監中。武帝與寶公。同遊此山。見林巒殊勝。命建精藍。

## 長于寺

建康南五里有山岡。其間平地。庶民雜居。有大長于，小長于，東長于，並是地名。小長于在瓦棺寺南。巷西頭出大江。梁初起長于寺。